



Cun paucas e schumbers da la grupp «Borumbaia» è vegnida lantschada sonda a Cuira la campagna per l'iniziativa da chatscha.

FOTO DAVID TRUTTMANN

Ina «revoluziun» cun potenzial emoziunal

Lantschè la campagna per l'iniziativa per ina chatscha etica

DAVID TRUTTMANN/FMR

■ **Il 13 da zercladur 2021 decida il suveran grischun davart la «Iniziativa per ina chatscha etica e cumpatibla cun la natira». La discussiun en vista a quella decisiun pudess esser emoziunala. Sonda passada han ils aderents lantschè a Cuira lur campagna per «revoluziunar la chatscha grischuna». Cun paucas e tamburs en il vair senn dal pled è vegnida lantschada sonda a Cuira dals iniziants la campagna da votaziun per lur «Iniziativa per ina chatscha etica e cumpatibla cun la natira». E cun paucas e posaunas pudessi ir vinavant questas proximas emnas. Perquai ch'ìl tema chatscha polarisescha. I vegn segiramain a dar brevs da lecturs en crusch e traviars e debattas en las medias socialas. Quai ha demussà l'onni passà la discussiun per ina revisiun da la lescha da chatscha federala, l'uschenumna da «Lex luf». Ussa vai però vi dal viv da la chatscha grischuna tradiziunala.**

Però *Marion Theus*, la presidenta da l'uniun purtadra e l'emprima inizianta, ha fatg valair sonda a Cuira, a l'inscunter cun las medias: «Nus n'essan insumma betg encunter la chatscha grischuna. Nus la vulain refurmar ed adattar al temp dad oz.»


In lung gir tras las instituziuns

L'istorgia da quest'iniziativa chantunala è gia bunamain epica. Gia dapi l'onni 2012 fa l'iniziativa ses girs, cura che iniziants ed iniziants eran ids sin via per rimnar sutta-scripziuns. E dapi lura ha l'iniziativa fatg tras in'odissea sco mo paucs projects politics: l'iniziativa è vegnida inoltrada dal 2014, suenter è ella vegnida taxada da la regenza grischuna sco nunvalaivla, alura hai dà in gir da recurs tras ils tribunals da Cuira enfin giu Losanna – per alura finalmain turnar en Grischun davant il pievel il 13 da zercladur 2021. Er *Marion Theus* è da l'idea: «Quai ha cuzzà blier memia ditg!» Schegea ch'ella crai che tut quel temp haja lavurà per l'iniziativa: «Tenor las reacziuns che nus survegnin, datti adina dapli gliud ch'è critica u perfin cumpletmain encunter la chatscha.»

Revoluziunar la chatscha

Tge intenziuns han però ils aderents e las aderentas, ils quals han lantschè sonda da lur campagna cun il motto «Revolu-

ziunain la chatscha grischuna?» – La «Iniziativa per ina chatscha etica e cumpatibla cun la natira» (guarda survista grafica) vul p.ex. stritgar tuttas furmas



Ils nov puncts da la «Iniziativa per ina chatscha etica e cumpatibla cun la natira - e sia lunga via tras las instanzas. Il puncts blaus simboliseschan glisch verda, il cotschens muntan che l'instanza ha declarà quests sco nunvalaivels u be per part valaivels. A la fin è tut vegni «blau», uschia che votantas e votants grischuns decidan il 13 da zercladur.

ILLUSTRAZIUN RTR GRAFICA

da chatscha a partir da november, damai era la chatscha supplementara. Ella vulesse era scumandar la chatscha sin utschels, sin vatgas e chauras che portan e mainan e sin lur vadels ed ansieuls. L'iniziativa cuntegna però era in u l'auter punct in pau particular, sch'ella vul p.ex. che chatschaders e chatschaders dastgan baiver be tant alcohol sco cun ir cun auto, u sch'ella vul ch'ìls posts tar l'Uffizi da chatscha e pestga ed en la Cumissiun da chatscha vegnian occupads per la mesadad cun protecturs/as d'animals.

Ina iniziativa extrema?

Gist quels aspects han manà a la decisiun unanima il favrer da quest onni en il Cussegl grond. Deputadas e deputads han numnadamain recumandà unisono da refusar l'iniziativa, gist perquai ch'ella sajettia sur la finamira ora.

È l'iniziativa damai memia extrema, vul ella memia bler? – *Marion Theus* refusescha quella critica: «Noss'iniziativa n'è insumma betg extrema! Tge arguments pledan encunter ina chatscha cumpatibla cun la natira? Noss postulats n'èn betg encunter la chatscha grischuna. L'iniziativa è simplamain encunter intgins aspects da quella.»

Che la campagna pudess daventar emoziunala, quai po era *Marion Theus* s'imaginar. Ma per ella n'è quai nagin novum. Sco ella raquinta a la FMR haja ella er gia survegnì ils davos onns smantschas anonimas. Lur campagna finanzieschan ils iniziants – tenor atgnas infurmaziuns – cun raps da fautors. E gea, sco *Marion Theus* tradescha, hajan els perfin dà si in inserat en la gasettina «Chatschader grischun» per in gea a lur iniziativa. *Marion Theus*: «Enfin ussa n'avain nus udì nagut da la redacziun – lain guardar!»

Durant questas proximas emnas vegnan segir e franc era ils adversaris da l'iniziativa a far valair lur arguments, uschia che la discussiun po cumenzar, senza dubi cun in u l'auter rataplan sin paucas e schumbers.